


DINKEL

Triticum spelta - Gramineae

VON DER SPELTZ ODER DÜNKEL.

Der Speltz haben wir zwey Geschlecht/ das erste Geschlecht das eygentlich von uns Teutschen Speltz genannt wirdt/ ist mit seinen Graßblettern/ Halmen/ Knöpffen und Aefern dem Weytzen gleich/ allein daß er sich mit Flegeln wie der Weytzen außtreschen lässet/ sondern muß auff der Mühlen wie die Gersten gerollet unnd gescheelet werden. Ein jedes Hülßlein hat gemeiniglich zween Kernen/ als zween Zwilling neben einander eyngeschlossen/ zeitiget mit dem Weytzen/ unnd muß ein gutes wolgebauwenes Erdtreich haben.

II. Das zweyte Geschlecht der Speltz sonst Einkorn genannt/ ist mit dem Halmen kürtzer/ kleiner und schmärer dann die Speltz/ siehet doch der Speltz nicht ungleich/ außgenommen daß diese Frucht mit Halmen/ Hülßen unnd Granen/ braunrötlecht ist/ die Aeher haben zween Verß oder zwo Zeilen/ und lange rauhe Stacheln wie die Gerst/ wirdt under den Speltz unnd Weytzenfrüchten am allerlangsambsten zeitig/ wiewol sie im Herbstmonat mit der Speltz gesäet wirdt/ muß auch gleich wie die Speltz auff der Mülen entblößet und gescheelet werden. Diese Frucht wächst gern in rauhen Feldern und darff keins sonderlichen getüngten Ackers/ derwegen sie die Bawleuth auff die rauhen Felder/ die lange zeit ungebauwen/ und gepflüget gelegen/ zu säen pflegen.

Von den Namen der Speltz.

Die Speltz ist am Rheinstrom viel gemeiner als der Weytzen/ unnd ist ein wahres Geschlecht desselben. Lateinisch ZEA, SPELTA, SEMEN und FAR, wie DIONYSIUS HALICARNASSAEUS und ASCLEPIADES bey dem GALENO 9.SECUNDUM LOCA. Bezeugen/ sonst wirt es auch genannt/ ADOR, ADOREUM, SEMEN ADOREUM und FAR ADOREUM. Hochdeutsch/ Speltz/ Dinkel/ Tinkel/ Dinkelkorn unnd Zweykorn.

I. Das erste Geschlecht aber wird von dem andern Geschlecht auch/ wiewol jhme alle obgemeldte Nahmen eygentlich gebühren/ mit besonderen Namen underscheiden/ unnd wird Lateinisch genannt/ ZEA DICOCCANS, sonst gebühren jhm aller obgemelter Sprachen Namen.

II. Das ander Geschlecht aber heisset Lateinisch/ ZEA MONOCOCCUS, ZEA SIMPLEX und FRUMENTUM MONOCOCCUS. Teutsch/ Einkorn/ Rimkorn/ S. Peterskorn/ dz ist/ FRUMENTUM DIVI PETRI, unnd Blicken.

Von der Natur/ Krafft/ Wirckung und Eygenschafft der Speltz.

Speltz oder Dünckel hat ein mittel Art unnd Natur zwischen dem Weytzen unnd der Gerst/ trucknet sänfftiglich/ gibt besser Nahrung dann die Gerst/ und füttert geringer dann der Weytzen.

Innerlicher Gebrauch der Speltz und Speltzenmeels.

Auß dem Speltzenmeel machet man herrliche gute Breylein nicht allein vor die Gesunden/ sondern auch vor die Krancken/ die bereydet man mit Mandelmilch/ mit Kühe oder anderer Milch/ Fleisch/ Hünern unnd Capaunenbrühen/ wie es jede zeit die gelegenheit geben wil. Solche Breylein aber müssen sehr wol gekocht seyn/ die sind nützlich in den Kranckheiten der Brust und Lungen/ dienen wider den Husten unnd die Lungensucht oder Schwindsucht/ seyend auch fast heylsam in allen Bauchflüssen.

In der Lungensucht soll man solche Breylein mit Geyßmilch zurichten/ unnd damit sie in dieser Schwachheti desto dienlicher seyn mögen/ soll man die Geyß mit lauter Speltz füttern und erhalten/ unnd sie sonst nichts anders essen lassen. Speltzenmeel mit Butern unnd Wasser zu einem Breylein wol gesotten/ ist denen fast dienlich die Blut außspeyen/ täglich genützet.

Speltzenmeel mit Mandelmilch zu einem Breylein gesotten ist eine heylsame Speiß/ denen so mit dem drittägigen Feber beladen seyend.

Speltz in Wasser gesotten und die Brühe getruncken/ oder mit Geyssen unschlit zerlassen/ darnach wie ein Clistier zu sich genommen/ ist dienlich wider die Bauchflüß/ heylet die versehrung der Därm/ oder verhütet daß sie nicht von der scharpfen Feuchten versehret werden.

Eusserlicher Gebrauch der Speltz und Speltzenmeels.

Speltzenkleyen mit Essig gesotten/ vertreibt die Wernher der Augen/ wie ein Pflaster übergelegt.

Speltzenmeel mit seinen Kleyen oder ugebeutel mit Mertzveielöle und frischem Buttern der nicht gesaltzen ist/ temperirt wie ein Pflaster/ ist eine gute Artzeney wieder die Geschwulst der Leber von Hitz/ auff ein Tuch gestrichen unnd übergelegt.

Wider die Schlauchwassersucht: Nimb dreyssig Untzen Speltzenmeels/ der Blumen von dem Asierstein fünffzehen Untz/ Mumig zwölf Untz/ alles zu reinem Pulver gestossen/ temperiert diese Stück mit Schweinenschmaltz das ein Nacht im Wein gelegen seye/ zu einem Pflaster/ streich es auff ein bequem leinin Tuch oder auff einen Barchen/ unnd legs über den gantzen Bauch/ solches erfrische widerumb je über den dritten Tag.

Wiltu Eyer über den Winter frisch behalten/ so vergrab sie wol in Speltzen daß sie warm ligen/